

MOJA, TVOJA
**NAŠA
ZEMLJA**

Naša rješenja za Unsko-sanski kanton

1.

Korupcija – maligni tumor našeg društva

Usvajanje Zakona o prijavljivanju i postupku provjere podataka o imovini nosioca javnih funkcija i osnivanje Ureda za borbu protiv korupcije bio je jedan od naših uvjeta za podršku formiranju Vlade USK krajem 2018. godine. Neispunjavanje tog obećanja je razlog zašto smo tu podršku uskratili. Uz snažan pritisak međunarodne zajednice i Naše stranke, ovaj zakon je napokon usvojen tek krajem 2021. godine. Ured za borbu protiv korupcije još nije osnovan zbog čega je i sam zakon neprimjenjiv.

Stranke koje u svojim redovima među ministrima i zastupnicima imaju osobe sklone korupciji ne žele da zaživi jedan takav antikoruptivni mehanizam koji je pokazao izvrsne rezultate u Kantonu Sarajevo. Osnivanje Ureda za borbu protiv korupcije bit će u fokusu rada naših zastupnika u Skupštini USK, a borba protiv korupcije prioritet našeg političkog djelovanja.

2.**Naši mladi – naša
budućnost**

Demografske politike i mjere koje imaju za cilj ostanak mladih u Unsko-sanskom kantonu su se svele na 26 KM dječijeg dodatka i subvenciju mladim parovima za kupovinu manje od dva kvadrata prve nekretnine. U Kantonu Sarajevo porodiljne naknade iznose hiljadu maraka mjesečno, udžbenici za djecu od petog do devetog razreda su besplatni, zahvaljujući subvencijama ukinute su liste čekanja u vrtićima, a mladi parovi za kupovinu prve nekretnine dobijaju 10 hiljada KM. Ovaj paket mjera ćemo implementirati u mandatu 2022 - 2026 i tako smanjiti stopu odlaska mladih parova i porodica u inostranstvo.

3.

Javno zdravlje – uslov za progres

Najveći problem u upravljačkoj strukturi javnih zdravstvenih ustanova predstavlja neadekvatno educiran kadar, bez iskustava u upravljanju zdravstvenim ustanovama, postavljen po stranačkim a ne po zaslugama u zdravstvu. Nužno je maksimalno profesionalizirati takve funkcije i uvesti menadžerske pozicije, sa stručnjacima koji imaju adekvatno iskustvo i izvrsne rezultate u upravljanju. Organizirat ćemo javne konkurse za takve pozicije s jasno izrađenim programima sanacije dosad nanesene štete zdravstvenim ustanovama.

4.

Dijaspora - resurs znanja i iskustva

Naši stručnjaci i uspješni poslovni ljudi koji žive izvan BiH mogu postati najvažniji resurs ideja, znanja i kapitala, koji Unsko-sanskom kantonu može omogućiti privredni zamah i podignuti našu ekonomiju na noge. Formirat ćemo posebno tijelo pri Vladi Kantona koje će se baviti pitanjem dijaspore i njenim povezivanjem s Privrednom komorom, Obrtničkom komorom, Razvojnoum agencijom, Univerzitetom u Bihaću, te sektorima poput IT-a i drvoprerađivačke industrije.

5. USK – eko kanton

Maksimalno iskorištavanje potencijala koje imaju Una, Sana, Krušnica, Bliha, Dabar, Sanica, Plješevica, Grmeč, Ostrožac, Sokolac i druge turističke lokacije te njihovo povezivanje u jedinstvenu turističku ponudu Krajine, prirodno će voditi ka razvoju eko i ruralnog turizma, poljoprivrede i prehrambene industrije, ali i izgradnji putne komunikacije ka kantonu i unutar njega. Razvoj turizma mora biti jedan od strateških ciljeva vlasti u USK, a ministarstva privrede i okoliša moraju voditi glavnu riječ u procesu brendiranja „zelenog kantona“ kroz programe podrške lokalnim turističkim zajednicama te njihovom uvezivanju u jedinstvenu ponudu. Pooštrit ćemo propise kada je riječ o zagađivačima okoliša i nelegalnoj gradnji. Također, izgradnja modernog reciklažnog centra bit će jedan od naših prioriteta u mandatnom periodu 2022 - 2026.